

ՍՈՒՐԲ ԾՆՆԴՅԱՆ ԵՎ ԱՍՏՎԱԾՀԱՅՏՆՈՒԹՅԱՆ ՏՈՒՆԸ ՄԱՅՐ ԱԹՈՌ ՍՈՒՐԲ ԷԶՄԻԱԾՆՈՒՄ

Հունվարի 6-ին աշխարհասփյուռ Հայաստանյայց Առաքելական Սուրբ Եկեղեցին տոնախմբեց մեր Տիրոջ և Փրկչի՝ Հիսուս Քրիստոսի Սուրբ Ծննդյան և Աստվածհայտնության հրաշափառ տոները:

Նախորդ օրը՝ հունվարի 5-ին, հավարտ երեկոյան ժամերգության, հանդիսապետությամբ Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսի և մասնակցությամբ Մայր Աթոռի միաբանության ու բարեպաշտ հայորդիների, Միաձնաէջ Սուրբ Տաճարում մատուցվեց Ճրագալույցի Ս. Պատարագ: Պատարագիչն էր Մայր Աթոռ Ս. Էջմիածնի միաբան Տ. Փառեն եպիսկոպոս Ավետիքյանը: Պատարագից հետո կատարվեց նախատոնակ, հավարտ որի Նորին Սրբությունը զանգերի ուրախալի դողանջների ներքո ավետեց մեր Տեր Հիսուս Քրիստոսի Սուրբ Ծնունդն ու Աստվածհայտնությունը: Արարողության ավարտից հետո Մայր Աթոռի բակը ողողվեց հարյուրավոր մոմերի լույսերով, որոնք հավատացյալները տանում էին իրենց հետ՝ Տիրոջ Սուրբ Ծննդյան կենարար լույսով լուսավորելու իրենց ընտանեկան հարկերը:

Հունվարի 6-ին հայոց հոգևոր կենտրոն Մայր Աթոռ Ս. Էջմիածնում տոնական մթնոլորտն էր իշխում: Միաձնաէջ Մայր Տաճարում Հայրապետական Ս. Պատարագ մատուցեց Ն.Ս.Օ.Տ.Տ. Գարեգին Բ Ամենայն Հայոց Կաթողիկոսը՝ որպես առընթերականներ ունենալով Մայր Աթոռ Սուրբ Էջմիածնի դիվանապետ Տ. Արշակ եպիսկոպոս Խաչատրյանին և Երևանի Ս. Գրիգոր Լուսավորիչ Մայր եկեղեցու հոգևոր տեսուչ, ԵՊՀ Աստվածաբանության ֆակուլտետի դեկան Տ. Անուշավան եպիսկոպոս Ժամկոչյանին:

Խաչերով ու խաչվառներով զարդարուն Հայրապետական թափորը Վեհարանից «Խորհուրդ խորին» շարականի երգեցողությամբ և ամպիովանիի ներքո Ամենայն Հայոց Հայրապետին առաջնորդեց դեպի Մայր Տաճար՝ Սուրբ Պատարագ մատուցելու հրաշափառ տոնի առիթով:

Ս. Պատարագի ընթացքին Ամենայն Հայոց Հայրապետն իր պատգամը ուղղեց համայն հայությանն ի Հայաստան, յԱրցախ և ի Սփյուռս աշխարհի (տե՛ս էջ 3):

Նորին Սրբությունը շեշտեց, որ ճշմարիտ սիրով և աշխարհի մեջ Աստծո ներկայության հավատով է, որ պիտի ծնունդ առնի այն աշխարհը, ուր խաղաղությունն ու արդարությունն են թագավորում, ուր բարին ու բարիքն են արգասավորվում եղբայրսիրությամբ, ժողովուրդների համերաշխությամբ, պետությունների գործակցությամբ:

Մայր Աթոռ Սուրբ Էջմիածնից Հայոց Հայրապետը եղբայրական սիրո իր ողջունները հղեց Հայաստանյայց Եկեղեցու նվիրապետական աթոռների գահակալներին՝ Արամ Ա Մեծի Տանն Կիլիկիո Կաթողիկոսին, Երուսաղեմի Հայոց Պատրիարք Տ. Թորգոմ



Ա. ՄՆԵՂՅԱՆ Ա. ՊԼՏԱՅԻՆԻ ԿԻՆԵՄԱՏՈԳՐԱԲԻՅԱՆ ԸՆԹԱՆԳՈՒՄ



ՀԱՅՐԱՊԵՏԱԿԱՆ ՕՐՀՆՈՒԹՅՈՒՆ



Ս. ԽԱՆՔԵԼՆ ՀԱՅՐԱՊԵՏԱԿԱՆ ԹԱՓՈՐԸ

արքեպիսկոպոս Մանուկյանին, Կոստանդնուպոլսի Հայոց Պատրիարք Տ. Մեսրոպ արքեպիսկոպոս Մութաֆյանին:

Հայոց Հայրապետը Հայրապետական իր օրհնությունն ու սերը բերեց նաև Եկեղեցու ուխտապահ հոգևոր դասին և ի սփյուռք աշխարհի համայն հայ ժողովրդին: Նորին Սրբությունը Սուրբ Ծննդյան ավետիսով Հայրապետական իր ողջույնն ուղղեց նաև ՀՀ և ԼՂՀ նախագահներին, հայոց պետական ավագանուն՝ ի դեմս Ս. Պատարագին ներկա ՀՀ վարչապետ Սերժ Սարգսյանի, Հայաստանում հավատարմագրված դիվանագիտական առաքելությունների ղեկավարներին ու ներկայացուցիչներին:

Հավարտ Ս. Պատարագի Ամենայն Հայոց Հայրապետը կատարեց Ջրօրհների արարողություն՝ ի հիշատակ Հորդանան գետում Քրիստոսի Մկրտության: Այս տարի Մայր Տաճարում ջրօրհների Խաչի կնքահայրն էր Հայ Առաքելական Եկեղեցու ամերիկահայ բարերար տիար Հրաչ Թուֆայանը, որի ազնիվ նվիրատվությամբ վերանորոգվել և գործելու է Էջմիածին քաղաքի Հայորդյաց տունը:

Ս. Պատարագին և Ջրօրհների արարողությանը ներկա էին ՀՀ վարչապետ Սերժ Սարգսյանը, ՀՀ կառավարության անդամներ, ԱԺ պատգամավորներ, պետական այլ բարձրաստիճան պաշտոնյաներ, Գերագույն Հոգևոր Խորհրդի անդամներ, Հայաստանում հավատարմագրված օտարերկրյա դիվանագետներ, գիտության և մշակույթի նվիրյալներ:

Սրբազան Պատարագից հետո Վեհարանում տեղի ունեցավ պաշտոնական ընդունելություն:

*ՄԱՅԸ ԱԹՈՌ ՍՈՒՐԲ ԷԶՄԻԱԾՆԻ
ՏԵՂԵԿԱՏՎԱԿԱՆ ՀԱՄԱԿԱՐԳ*